



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3

WYC: Bharali Bedabrate-i
bronze medal angu

Atiq Ahmed takum tepeyong
tepuokdak ayutsu obendang agutsu



VOL. XX NO. 166 (ADOK 166)

DIMAPUR RASEMNÜ (WEDNESDAY)

METSÜREMI (MARCH) 29, 2023

₹ 5.00

Nagaland Assembly-i Budget 2023-24 agizükogo

Kohima, March 28, 2023 (TYO): Nagaland Assembly-i Mongulbarnü Rs 23,085.66 crore indang Budget 2023-24 agizükogo.

Hombarnü Chief Minister Neiphiu Rio-i Rs 1,374.17 crore deficit aliba Budget benoka liasü. Ajisiaka opposition maliba sorkar asü nung MLA shingaia budget 2023-24 nung cut motions bener maru.

Tanü CM Rio-i Nagaland

Appropriation (No. 2) Bill, 2023 benokba züngsem ajaki agizük.

Iba Bill ajanga March 31, 2024 tashi Nagaland state consolidated fund nungi senotsü agütsüsü aser amshitsü tashi agütsür.

Tanü NLA-isa financial year 2022-23 atema supplementary demands for grants agizük. Iba ya Nagaland Appropriation (No. 1) Bill, 2023 ajanga Rs 1,852.98 crore atema lir.

Nagaland sorkar nungja mali

Kohima, March 28, 2023 (TYO): 14 buba Nagaland Legislative Assembly ya 'opposition' maliba sorkar ka saka tang tashi nungja ka magütsü lir ta Chief Minister Neiphiu Rio-i Hombarnü ashi.

NCP, NPP, LJP, RPI, NPF, JD(U) political party tem aser Independent MLA temi sorkar pusema nungitba atema tenüsang agütsür, ta pai ashi.

"Nenoki nungitba ajanga Nagaland nung opposition maliba sorkar ka kumogo aser MLA shinga opposition bench nung mamener. Nagaland-i ano maneni telongjem aser ka akumba osang tajung sangoktsüogo" ta Rio-i

metetdaksü.

"Tanga political party tem aser Independent MLA temi sorkar pusema nungitba ya ni mezüing anogo nungi pelashishia agizük. Ajisiaka BJP high command-i iba atema olemteptsü ashi. Ni parnoki pusema agizüksüla ta ashi aser ibaji BJP-ia mulunga agizük saka sorkar akumba sülen ang agizükang ta ashi" ta paisa ashi.

"Sorkar akumba sülen agizükba tetezti parnok sorkar office tem nung medendaktsüsü. Iba onük ya ni maneni onok den yariteper BJP den jembitsü" ta CM Rio-isa metetdaksü.

April 4 nungi Kohima nung B20 Summit tenzüksü

Dimapur, March 28, 2023 (TYO): Kohima nung April 4 nungi 6, 2023 tashi Group of 20 (G20) indang Business 20 (B20) Summit alitsü.

Alima nung shishilembartem den G20 dialogue forum ajanga agriculture, food processing, IT aser tourism maparen asoshi tesentaktep tajung aika yanglutsü.

Iba business summit ajanga Nagaland-i agriculture wadang aser tourism tsütsü shishilembatsü maongka angutsü kechiyong state nung nütsüing yongsük 60% jungnüa agri and allied sectors nung shilem agir.

Nagaland ya süngdong-lidong aser arem shiruru nung takar lir aser organic farming market

nung tetsüing ajemoka inyaker, ta DIPR-i metetdaksü.

G20 nung linük 19- Argentina, Australia, Brazil, Canada, China, France, Germany, India, Indonesia, Italy, Japan, Republic of Korea, Mexico, Russia, Saudi Arabia, South Africa, Türkiye, United Kingdom aser United States den European Union dena lir.

G20 züngsemtem yagi alima nung global GDP 85%, global trade 75% tema aser nütsüing yongsük asemsü nung anasü lir.

B20 ta asüba ya official G20 dialogue forum lir aser iba nung global business community dena lir. B20 ya 2010 kum tentet aser 2010 indang telok tongtipang rongnung dena lir.

Assam-i Arunachal, Nagaland, Meghalaya & Mizoram den arrtsü mangatettep lir: Centre

New Delhi, March 28, 2023 (Agencies): Assam-i kidanger state pezü- Arunachal Pradesh, Nagaland, Meghalaya aser Mizoram den arrtsü mangatettep lir ta Centre sorkari tanü metetdaksüogo.

Lok Sabha nung DMK MPTR Paarivendhar-i asüngdangba ka langzüdang Union minister of state (home) Nityanand Rai-i iba osang lemsatep.

"Assam-Arunachal Pradesh, Assam-Nagaland, Assam-Meghalaya, Assam-Mizoram tsüngda arrtsü latetba nung mangatettep lir aser state shiai pei kulitem agütsür" ta Nityanand Rai-i ashi.

India nung states aser union territories 14 tsüngda arrtsü

tsütsü mangatettep ken o tem adoka lir ta paisa shisem.

Artsü mangatettep aliba tanga states aser UTs ji Haryana-Himachal Pradesh, Ladakh-Himachal Pradesh aser Maharashtra-Karnataka lir.

Sorkartem tsüngda amalitep ali nung dang states aser UTs tsüngda arrtsü ken o tem angatetteptsü akok, kechiyong Centre sorkaribo state aser UT tsüngda tiyongtsü nung teyariteper shilem dang agir, ta MoS Rai-isa metetdaksü.

"Ministry of home affairs-i mapang shia states aser UTs dang law & order tiptema ayutsü ashir aser tashi mangartem ozüing tapet agi merenshitsü tuyur" ta paisa shisem.

Nagaland Assembly-i 2001 Municipal Act agiener

Dimapur, March 28, 2023 (TYO): Nagaland Legislative Assembly (NLA) nung MLA 60 prongi Nagaland Municipal Act (NMA) 2001 agientsü bangjemtepogo.

NMA 2001 meyipa mereprangshi tashi Urban Local Bodies (ULB) indang election magidaktsüsü ta public-i amokmerenba sülen state sorkari iba telemteba agiogo.

Kin hohotem, civil society teloktem aser nübor ajaki ULB elections anema noktakba agizük. Nagaland Municipal Act 2001 mapa kuma inyaktsüba nung ashishiteper kechiyong public-i iba Act ya Arlla 371-A tangatetba anema lir ta ashir, ta tanü NLA züngsem ajaki bangjemtep.

Constitution of India nung Municipalities aser Town Councils nung tetsür nem shilem lemezüksüba Part IX A nung Nagaland madentsü ta 2012 kum NLA-i bangzüng renema liasü. Ajisiaka 2016 nung NLA-isa tanga bangzüng ka ajanga iba bangzüng agiena liasü, ta parnokisa ashi.

December 2016 nung State Election Commission-i ULBS

indang election agitsü osang sangoktsü. Iba sangdong nung February 1, 2017 nü polling asütsü metetdaksü saka kin hohotem aser Nagaland nung telok balalai lungkak aitba sentong aser mokdang ayongzüka agi.

"Iba ajanga Nagaland sorkar atema law & order tensa tamajung ka ajuru aser sorkar kiojen aika rongdoktsüba den tapayutsü takütem sama. Iba ajanga sorkar ketdangsubaren hopta aika mali aküim aser telok balalai sorkar office tem shibangtsü aser sorkar garitem mesenzüdaktsü" ta tanü bangzüng renema nung shia lir.

Sorkari tensa ajunga asadanga sülen ULBs indang election magitsü ta sangoktsüsüsa aküm.

March 9, 2022 nü State Level Consultative Meeting nung bangzüng ka renem aser iba nung kin hohotem aser tanga teloktem aden. Iba senden nung Urban Local Bodies (ULB) election ya Constitution of India indang 74 Amendment Act nung ajemdaker agitsüla ta bangzüngtep, ajisiaka sorkari election agitsü mapa inyakdang

kin hohotem aser tanga teloktemi Act 2001 ajunga meyipa reprangshitsü akhanger aser Arlla 371-A dak kongshir ta shia ULB Elections nung shilem magitsü metetdaksüogo.

Supreme Court of India-i ULB elections agitsü tetuyuba agütsüogo saka nübortemi akhangba ama Act nung temelenshi mesüra tensa tamajung ajurutsü ta state sorkari osangtem angazükogo. Iba nungji ajemdaker state Cabinet anaben tashi ajurutepa tekong merangtepa angatetteptsü merangtepa saka kin hoho ajak aser telok balalai mokdangba ajanga shilem agitsüpur mali ta metetba ajanga sorkari ozüing agi agitsü makok ta angatetogo, ta tanü NLA züngsemtemisa bangjemtep.

"Nübortemi election nung shilem agitsü tejakleni marura parnok dak tashiyim agi inyakdaksüsü makok. Iba jagi Cabinet-i iba onük ya Legislative Assembly dangi aben aser tanü assembly nung benoka jembitepdang NMA 2001 magien tashi Urban Local Bodies election magitetsü ta angatet" ta NLA züngsemtemi bangjemtep.

Eastern Nagaland nem 'autonomous region' agütsü junger

Kohima, March 28, 2023 (TYO): Nagaland state sorkari Eastern Nagaland nung district 6 nem state balaka masü saka 'autonomous region' agütsü junger ta shidangogo.

Hombarnü Chief Minister Neiphiu Rio-i Budget 2023-24 benoka jembidang Eastern Nagaland Peoples' Organisation (ENPO)-i kum 10 tejakdang nungi "Frontier Nagaland" ta ser state balaka aküimtsü takhangba agüja arur ta ashi.

Nagaland state akumba sülen kum 60 süia arudang terenlok jenti nguogo saka maparen teinyaktsü aika lir aser itemji talisa Eastern district tem nung nüngdaker, ta Rio-i ashi.

Centre sorkari ENPO aser state sorkar den asüngdangtepa langka

ka inyaktsü ta Union Home Minister Amit Shah-i aiben nangzükogo aser iba ya autonomy aser economic development atema lir, ta CM Rio-isa metetdaksü.

State sorkari Eastern tesemtem asoshi 'autonomous region' ka aküimtsü shidangogo aser iba ya ataloktsü atema state sorkari akokba tashi yariteptsü ta paisa shisem.

"Onoki India sorkar dang eastern region nem special economic package ka agütsüsü ayongzükogo aser iba ya taruba ita ishika tsüngda ataloktsü amanger" ta Rio-isa ashi.

"Nagaland ya state tila ka dang lir aser talila lemsara tashimait aküimtsü. State lemsatsü ta asüdang temulung raksar anungji asenok tali longjemtsüla. Naga

nunger aliba tesem ajak ketdangsubaren ka kübok dang asenoki linür" ta paisa ashi.

Nagaland Legislative Assembly-i 1964, 1970, 1994, 2003, 2015 aser 2018 kumtem trokben tashi Naga nunger aliba tesem ajak ka aküimtsü bangzüng renemogo, ta Rio-isa shisem.

"Eastern Nagaland nung terenlok agi anüingba aser rongsenketzüng tayongzükbatem ya süoki bilema inyaktsüla. Ajisiaka state sorkaribo Naga nunger ajak ka kuma longjemtsü atema dang noktaksü" ta Chief Minister-isa metetdaksü.

"Asenok ajak ka tangatetba nung aser longjemmer alitsüla aser iba ajanga Eastern Region ya Nagaland atema petinu tesangwa ka aküimtsü" ta paisa shisem.

Nagaland Medicine Dealers Association (NMDA)-i lungkak ait

Dimapur, March 28, 2023 (TYO): Nagaland Medicine Dealers Association (NMDA) züngsem ka Narcotic Drugs and Psychotropic Substances Act, 1985 kübok apuba anema tanü NMDA kübok medical dokan ajak shibanger lungkak aitogo.

"Ozüing amertemi tashiyim amshiba aitsür aser ozü züngsem anema iba mapa inyakba nisungtem merenshitsü akhanger" ta NMDA-i sangdong ka nung metetdaksüogo.

NMDA züngsemtemi restricted drugs tim mesüi amshiba anema onoki noktaker aser iba mapa inyakertem pusema menungiter. Ajisiaka

sensosangertem dak mebilemdangi mapa inyakba ya meimchir temeten anema lir anungji ozüing amertemi tashi aibelena mamshitsü ayongzüker, ta parnokisa ashi.

All India Organization of Chemist and Druggist aser Northeast office ajanga iba ken o nung tebang aitsü ayongzüker aser Indian Medical Association o tanga teloktemia ozüing alema ozü züngsem apuba anema ola adoktsü mepishir, ta NMDA-isa ashi.

Health and Family Welfare Department, Nagaland-i state telongtet nung wholesalers & retailers atema restricted

pharmaceutical products aliba aser ayokba indang inyakyim latetja lir. Iba tetuyuba alema inyakertem Act of 1940 den Rules kübok mapa inyaktsü shia lir. Anosa Drug Control Authority-i dang mesüra parnok dang aibelenertem aputsü lateta lir anungji ozüing amertemi Act of 1985 kübok masü saka Drugs and Cosmetics Act, 1940 kübok mapa inyaktsü ayongzüker, ta NMDA-isa sangdong nung shia lir.

February 3, 2023 nü sangdong agütsüba nung 'indent' olung tim mesüi amshia aliba agientsü mepishir ta parnokisa ashi.

NLTP Act kübok hotel tulutem nung yi ayoktsü melar: CM Rio

Dimapur, Metsüremi/March 28 (TYO): Tourism jenjang ajungkettsü mechi state-i bendanger arur dang yi ayoktsü NLTP Act kübok melar aser iba tenokdangba tazüokba ka kübok agientsü nüburtem dang keta lir, ta Nagaland Chief Minister Neiphiu Rio-i ashi.

Nagaland Liquor Total Prohibition (NLTP) Act of 1989 ajanga Nagaland dang "wettest dry state" ta ajar aser Hombarnü State Assembly nung 2023-24 budget benokba mapang, terenlok tali asoshi nungdakba rongsen peritsü atema asenoki rongsen lenmang bushitsü nungdakba, ta Rio-i ashi.

Lenmang balala rongnung junga bilemdangtsü kaji state-i aruba bendanger dang star category nung aliba hotel kar nem yi ayoktsü melatsüba ya lir, koba NLTP Act, 1989 kübok mela lir, ta pai ashi.

Taküm April 4 - 6 anogotem Kohima nung G-20 Business Meet atema bendanger aika Nagaland-i arutsü lir aser tang jembiba ozüng kübok bendanger aser parnok den yariteper nem yi agütsütsü

mela lir, ta pai ashi.

"Tourism jenjang tali ajungkettsü asoshi bendanger aser parnok den yariteper dang yi ayoktsü nungdakba," ta Rio-i ashi.

Iba sülen osangbender senden ka nung, Excise Department indang Advisor tasenbai NLTP Act agientsü mesüra ozüng nung aliba ama shidak inyaktü tim ta ashiba dak sendakba nung sorkari iba Act agientsü tebilemba ali asü mali ta asüngdang dang, sorkar sentong balala Cabinet ajanga lemteter aser züngsem kijai masü, ta CM-i langzü.

"Züngsem (MLA) temi jembia alitsü akok saka yangji mangmangtsü kecha mali. Onoki talenba kecha mesalatsü saka 'NLTP Act 1989 Para 16 - Special permits to foreigners sovereign etc' indang jembia, anungji iba ozüng kübok sorkari mela aliba tashi amshitsü meranger dang... saka salatsü mesüra agientsü kecha mali," ta pai ashi.

Yi ayokba ketdangtsütsü aser azüoktsü asoshi Excise Department-i inyaktar, ta Rio-i ashi.

State nung license aliba yi ayokdak tesem aliba mapang dang nungi ozüng raksar timba aliba indang asüngdangba mapang, "Item ajakji nüburtem dak keta lir... nüburtemi maginü aser yangji tashiyim liasü," ta ashi.

Iba Act agizükdang arogo lenirtem den senden ameban bilemteta jembidang, "Nisung kari alima nung kodak yanglunü saka asenoki asangsang nung jembitsüla aser inyaktüla," ta Rio-i ashi.

"Tenokdangba agütsüba sülen asen nüburi yi tamajung ajemer, koba temang asoshi kanga majung lir... Miimshia yi ayoker temi mozü kar den meyoktepba ayokba aser aji jemer yangji asüba mesüra sen jenti indoka temang anepalura tatem nungba tasüba ajuruba tatalokbatem lir," ta pai ashi.

Tajung aser tamajung kasa asütsüla, ta ashi.

Iba Act ajanga bendanger aser diplomats tem dang ayoktsüba melar, aser yimjak nungbo mayoktsü saka parnok anenba hotel tem nung agütsütsü aser meilongi sorkari itemji azüoktsü repringtsü, ta CM Rio-isa ashi.

CHC Changtongya nung RCH Outreach camp ayongzü



CHC Changtongya nung March 28, 2023 nü RCH Outreach camp akadang tangokba noksa nung angur.

Dimapur, Metsüremi/March 28 (TYO): District Health Society, Mokokchung kübok CHC Changtongya, Mokokchung nung March 28, 2023 nü RCH Outreach camp ka ayongzüka liasü.

Iba sentong nung Dr. Takosunep, DPO (UIP & RCH), Dr. Imlisenba Lemtur, Pediatrician IMDH, Dr. Supongmeren Obs & Gynae IMDH, Mokokchung aser CHC Changtongya nung Medical

Officer temi anir medical team ajanga Paediatrics, Obstetrics & Gynaecology, Family Planning methods aser danga medical services agüja liasü.

Iba sentong nung nisung 116 tashi arua angati medical service agütsüba agia liasü.

Changtongya nung aliba civil society, ASHAs aser CHC Changtongya, Mokokchung nung staff temi yaritepba ajanga iba camp takok ngua agia liasü.

2nd Nagaland Harm Reduction Conference kaogo

Dimapur, Metsüremi/March 28 (TYO): Kripa Foundation, CDC, PATH, NSACS, NUN, NNagaDAO aser CAD Foundation lungjemer "Making a Difference" omen nung ajemdaker 2nd Nagaland Harm Reduction Conference, Vivor Hotel, Kohima nung March 28, 2023 nü ayongzüka liasü.

Iba sentong nung jembidang, iba sentong ya kanga tongtipang lir, kechiaser iba ya ajanga stakeholder ajungai pei tajangshibatam, takok anguba, tayongzükbatem lemsateptsü aser temesepba mozü aser HIV/AIDS tsütsü telangzüba tejangja agütsütsü asoshi public health aser social securitu indang sentong tashi taitba nung yanglutsü, tashidak nokdangtsü sentongtem yanglutsü aser kongshir alirtema anepaluttsü, ta Commissioner & Secretary, Health & Family Welfare, Y. KikhetoSema IAS ajanga ashi.

Kikheto-isa ashiba agi, NACO HSS Plus Report 2021 ajanga state nung HIV tensa indang ashiba nung ANC prevalence ya shilem 1.61 aser national average 0.22 lir, koba linük nung timba alitsü.

Arishi küm 15-49 tsünga adult prevalence rate ya shilem 1.36 aser national average 0.21 lir, koba linük nung tematiba jenjang tanabuba nung lir.

Lanur (arishi küm 15-24 tsüngta) shilem 16-i dang HIV/AIDS indang meteta lir, lanur shilem 45-i condom memetet

asexually active youth shilem 37-i high-risk sexual behaviour inyaker (NFHS-IV).

2022 küm December ita state data nung HIV positive cases shilem 21 dak tema arishi küm 24 majung aser HIV menatepba ya talisa Sexual (87%) aser Injecting (6.7%) nungi lir.

IDU (shilem 1.3 nungi 2.24) tem rongnung HIV tali akumer, ta HIV Sentinel surveillance of 2021 ajanga sayur.

NGOs aser field team temi anibelem mesasai nüburtem nem iba timtem angatetdaksütsü meranga aser mapang shidak nung service agütsüba asoshi Kikheto-i tenüngsang agütsü aser NSACS, NACO, development partners aser stakeholders temi yariba ajanga state nung IDU tem rongnung 1991 küm HIV prevalence shilem 39 aliba nungi 2021 küm shilem 2.4 kumogo, ta ashi.

State nung nisung tasen dak iba HIV tashidak menaloka aoba anendaksütsü asoshi pai maneni inyaktü ayongzü.

Health & Family Welfare Department aser state sorkari development partners, stakeholders, NGOs ajanga den külemi drugs, HIV & AIDS nokdangtsü asoshi inyaktü, ta pai ashi.

Iba sentong nung Dr. Melissa Nyendak, Director, Division of Global HIV & TB, CDC India, US Government tetushi tesemdang liasü.

Dimapur-Kohima railway line project meilongi renloktar: NFR



Dimapur-Kohima railway line project

Guwahati, Metsüremi/March 28 (Agencies): Northeast state tem tajungba kuma melenshidaktsüba tsütsü Indian Railways ajanga shilem tajung agia railway line project tasen aika yanglutar, ta Northeast Frontier Railway ajanga March 28, 2023 nü sangdong ka nung ashi.

"Northeast region nung state capital ajunga sendakteptsü asoshi railway line tasen yangluba maparen tang teinyakdak lir," ta Northeast Frontier Railway ajanga ashi.

Item rongnung Nagaland nung Dimapur nungi Kohima tashi broad gauge railway line yangluba ya ka lir, ta ashi.

"Iba project nung maka shidak inyaktar. Iba railway line tasenba ya ajanga Nagaland yimtiba Kohima ya linük indang

broad gauge railway map nung aittsü," ta NFR ajanga ashi.

Nagaland nung kilometre 82.50 talang Dimapur-Kohima railway line project tasenba ya Assam nung Dhansiri station nungi Kohima anasa Zubza tashi lir aser iba mapa ya Northeast Frontier Railway Construction Organization ajanga inyaker.

Iba project nung sen crore 6663 indoktsü takzüa lir.

Iba project tasazük kilometre 82.5 (Assam nung kilometre 2.75 aser Nagaland nung kilometre 79.75) lir aser yangji station tasen ti - Dhansiri, Dhansiripar, Shokhuvi, Molvom, Pherima, Piphema, Menguzuma aser Zubza alitsü.

Iba project nung apu tulu 24, apu tila 156, road over-bridges trok, road uner-bridges 15 aser

longpok 21 tasazük kilometre 31 alitsü.

Iba project nung Pherima nungi Piphema tsüngta Tunnel No 7 ya longpok talangtiba alitsü, koba metre 6520 asütsü.

Mapa tayongba nung inyaktü mechi project ka asem kuma lemsa.

Mezüngbuba phase ya Dhansiri nungi Shokhuvi tashi kilometre 16.5 lir, koba October 2021 nung renem.

Northeast nung state balala tsüngta rail tesendaktep tali ulushitsü mechi tawa passenger train service tem Shokhuvi nungi Arunachal Pradesh nung Nagarlagun aser Meghalaya nung Mendipathar tashi tenzü.

Tanabuba phase ya Shokhuvi nungi Pherima tashi lir, koba mapang talangka melie renemtsü amai lir aser Zubza tashi 2026 küm tashinung renemtsü nükjidong lir.

Iba train lenmang tasenba ya ajanga linük tesem balala nungi jangotzü aser danga osettsüset tem jenjang kanga agi talangba nung Nagaland atongtsü aser nüburtem ajangzüksü. Kasa mapang Nagaland nung rongsenketzung nunga terenlok alitsü.

DC Kohima ajanga Two Wheelers Taxi Permit atema metetdaksür

Dimapur, Metsüremi/March 28 (TYO): Two Wheeler Taxi Permit atema application agüja alir ajunga atema Deputy Commissioner, Kohima, Shanavas C, IAS ajanga teinyaktsü kar metetdaksüog.

Test Drives atema shimteta aliba candidates tem

tenüng ya Annexure A nung renemer DC Office, Kohima aser RTO Kohima indang Notice Board aser District website kohima.nic.in nung angutsü.

Application magizükertem tenüng ya Annexure B nung renemer DC Office, Kohima

as RTO Kohima indang Notice Board aser District website kohima.nic.in nung angutsü.

Test Drive nung asadangba nung ajemdaker shimertem interview atema shimtsü aser parnok interview agitsü anogo meilongi osang agütsütsü.

Test Drive atema shimteta aliba candidate tem ajak tsünglanglen agüja aliba tesem, anogo aser mapang nung arutsü metetdaksü:

Sl. No	Roll No.	Date of Test Drive	Time	Venue
1 (Day I)	1 to 150	30th March 2023	10:00 AM onwards	IG Stadium
2 (Day II)	151 to 299	31st March 2023	10:00 AM onwards	IG Stadium

In-Service Hindi Teachers training tanü tenzüksü

Dimapur, Metsüremi/March 28 (TYO): Directorate of School Education ajanga Government In-Service Hindi Teachers ajak dang sangdong ka nung ashiba agi, Directorate of School Education ajanga Samagra Shiksha Nagaland den lungjemer Orientation Training sentong ka Dimapur, Chumukedima aser Niuland district tem nung aliba In-Service Hindi Teachers asoshi

ayongzüker.

Iba training ya March 29 nungi tenzüka March 31, 2023 tashi Kuda Youth Hall, Half Nagarjan, Dimapur nung alitsü.

Anungji item district asem nung aliba In-Service Hindi Teachers ajak iba training nung adentsü metetdaksür. Iba sentong tejangja DEO/SDEO WhatsApp Groups tem ajanga agütsütsü, ta sangdong ajanga ashi.

Atiq Ahmed taküm tepeyong tepuokdak ayutsü obendang agütsü



Ozüng alema inyaksangshir aliba nungi yimden yimsüsür akümsang Atiq Ahmed Prayagraj nung okadaki anir aruba noksa nung angur. 2006 küm Umesh Pal apuba ken o nung aija pa tepuokdaki yokogo. Pal ya BSP MLA Raju Pal tepsetba ken o nung tenük kuli agütsür ka liasü shiba taoba ita tepseta liasü.

Ned Delhi, Metsüremi/ March 28 (Agencies):

Ozüng alema inyaksangshir aliba nungi yimden yimsüsür akümsang Atiq Ahmed aser tanga nisung ana 2006 küm Umesh Pal pur aoba ken o ka nung aija taküm tepeyong tepuokdak ayutsü obendang agütsüogo. Iba obendang ya Prayagraj nung court kati agüja liasü.

Umesh Pal ya BSP MLA Raju Pal tepsetba ken o nung tenük kuli agütsür ka liasü aser pa-a taoba ita tepsetogo, koba ken o nung aija alirtem sentong asütsü ta temulung melemi bilemer.

Atiq Ahmed, shiba taoba mapang Samajwadi Party lenir ka liasü pa okadak obendang agütsüba sülen süjia ao ta osang

ajanga metetdaksü.

Atiq Ahmed den külemi Saulat Hanif aser Dinesh Pasi nata Section 364A (Kidnapping for ransom) kübok aitsüogo aser iba atema temerenshi ya tasüba agi merenshitsu mesüra taküm tepeyong tepuokdak ayutsüba lir.

Kasa mapang nung aija alir asemprongla dang court-i senchi sen lakh kaka chiogo, koba asür kinungertem nem agütsütsü.

Atiq Ahmed ya 2006 Umesh Pal pur aoba ken o nung Prayagraj nung court kati taküm tepeyong tepuokdak ayutsü obendang agütsü. Umesh Pal shiba taoba ita tepsetogo, pa ya 2005 küm BSP MLA Raju Pal tepsetba ken o nung tenük kuli agütsürtem

rongnung tongtiba liasü, kong aija alirtem rongnung Atiq ya tongtiba liasü.

Atiq Ahmed atema ano tetsükdaksü kaji Supreme Court-i pa nem teküzmükba agütsütsü memulunger. Pai UP police dang teküzmükba meshi aser ashiba agi, pa tasa asar tepsettsü akok. Court-i Atiq dang iba ken o ya High Court nung benoktsü shiogo.

Maneni ken o dak sendakba nung Umesh Pal tetsüi par jabaso tepsetertem ya tasüba agi merenshitsu khangogo. Lai ashiba agi, par jabaso-i küm 17 shi raraogo saka tatem nung pa Atiq-i tepset. "Pa taküm tepeyong tepuokdak ayutsü obendang agütsüra pai maneni onok amokmerentsü," ta lai ashi.

India & Africa linüktem tesendaktep akangshitsüla: Indian Army chief

Pune, Metsüremi/March 28 (Agencies):

Kümtem tsüingda India nunger sepaitemi Africa nung tenzükba mapang teyari balala agütsüba indang jembiba mapang Chief of Army Staff General Manoj Pande-i Mongolbarnü, kiralongrar aser extremism anema India aser Africa linüktem tsüingda tesendaktep akangshitsüji kanga tongtibang ta ashi.

"Kiralongrar aser extremism anema tesendaktep akangshitsüji 2018 küm Ato Kilonser Narendra Modi-i Africa linüktem den tesendaktep atema onük 10 sangdongba nung ka lir," ta pai mezüngbuba India-Africa Army Chiefs' conclave nung jembiba mapang ashi.

"Asenok tajangshibatem lemsatepba ajanga security tsütsü amokmeren balala adokbatem atema tali tajungba renemshitettsü. Africa nunger army temi tensa tamajung nung inyaksangshiba tajangshiba aika bena lir aser parnoki tasa aser inyakyimtem lemsateptetsü," ta pai shisem. Paisa, Africa nung yimjung



ta army chief yagi ashi.

Nüjiso anguba sülen India-i developing nations tem atema ola adoka aruogo aser Africa decolonize asütsü pusema UN nunga tongti shilem agiogo, ta pai ashi.

Paisa, 1960 nungi tenzükba Africa nung United Nations peacekeeping missions balala nung Indian armed forces-i shilem agia arudar, ta ashi.

Ajisüaka Indian Army aser African army na tsüingda 1957 küm nungi sendaktepa aruogo. India-i 1957 küm Ethiopia nung military academy ka amenoktsü aser iba sülen 1964 nung Nigerian defence school tenzükja liasü.

Indian defence industry-ia African defence industries terenlok atema teyari agütsütetsü. Iba ajanga India nunger company tem nem atsülanga inyaksü atema teyari agütsütsü, ta General Pande-i ashi.

Iba sentong nung Africa linük 10 nungi army chief tem den representatives aser delegates 31 aser Indian armed forces ketdangsurtemi shilem agia liasü.

Party 19-i onok pusemdar: Congress

New Delhi, Metsüremi/

March 28 (Agencies):

Congress party-i Mongolbarnü sangdong ka ajanga block, district, state aser national level nung ita ka tepeyong agütsü aliba Jai Bharat satyagraha sentong indang sangdongogo. Ken o ya Rahul Gandhi indang masü saka democracy lendong nung aliba indang lir, ta general secretary Jairam Ramesh-i ashi.

Mongolbar aonung 7 ako nung New Delhi nung 'Save democracy' peace march sentong nungi tenzükba ita ka tepeyong agütsü aliba satyagraha sentong indang sangdongba mapang Congress-i ashiba agi, party 19-i Congress pusemdar aser iba longkak aitiba sentong atema sentong tatongi yangluogo.

Uddhav Balasaheb Thackeray Sena, shibai Rahul Gandhi-i Savarkar indang jembiba magizüki liasü, paia Congress pusemdar, ta general secretary Jairam Ramesh-i ashi.

"Tenüing menüktsüba ken o nung Surat nung court kati obendang agütsüba sülen ghonda 24 tsüingda Rahul Gandhi Lok Sabha nungi anentsü. Pa disqualify sütsüba sülen osangbenertem den sensaksema liasü. Osangbenertem den sensaksema sülen ghonda 24 tsüingda Rahul Gandhi dang official bungalow toktsütsü tetuyuba agütsü. Lok Sabha secretariat-i kanga kara mapa inyaksangshir. Ajisüaka Rahul Gandhi par ki atema kecha shisabulua mali ta parnoki memetet," ta KC Venugopal-i ashi.

ED-i BJP-i yimsü masüba state tem dang meita aoe: CM Baghel

New Delhi, Metsüremi/

March 28 (Agencies):

Chhattisgarh chief minister Bhupesh Baghel-i Mongolbarnü ashiba agi, Enforcement Directorate (ED)-i BJP-i yimsü masüba state tem dak dang rangloker inyaker aser BJP-i yimsü asüba state tem nung bo agency indang office amenoka mali ama reprangteter.

Coal levy money laundering case dak sendakba nung ED-i state nung asedenshir tesem balala meita aoba anogo CM-i iba olen lemsatepa laisü.

Chhattisgarh police ketdangsurtemi ashiba agi, ED-i coal levy money laundering case dak sendakba nung Dyrng aser Raipur nung tesem pezü meitaogo.

Ajisüaka ED-i iba dak sendakba nung official osang kecha magütsü. "ED-i ano Chhattisgarh nung meita aoba

"Onok iba atema shisamebulur. Ajisüaka parnok inyaksangshir ya Rahul Gandhi tsübudaktsütsü atema dang lir. Item inyakyim ajanga onok tsüba malitsü," ta Venugopal-i ashi.

Hombarnü opposition lenirtem den senden amenba mapang Rahul Gandhi-i, ken o ya pa disqualify sütsüba indang masü ta shiogo, ta Jairam Ramesh-i ashi. "Ken o ya Rahul Gandhi kümzüktsüba atema masü ta pai pasasa shiogo, ajisüaka ken o ya democracy aser Constitution kümzükba ayutsüba atema lir," ta Jairam Ramesh-i ashi.

"Onok tasüingdangbaji Adani aser Narendra Modi na kechi tesendaktep ali. Sorkari JPC maginer," ta Ramesh-i shisem.

"Sorkari Nirav Modi nem taitok agütsür. Parnoki taoba küm teku tashi caste census magir ajisüaka tang iba ya OBC ken o ka kümdaktsür. Yashi senden nung party 19-i obangka ser democracy lendongbang nung lir ta shiogo aser onok ajak longjemer inyaksüla ta bangjemogo," ta Jairam Ramesh-i ashi.

Congress-isa, tenüing menüktsüba ken o nung Rahul Gandhi tepuokdaki küm ana yoktsü atema Surat court-i obendanga agütsüba dak sendakba nung party indang legal team-i inyaksangshidar ta ashi. Iba ken o dak sendakba nung temepeshiba ka benoktsü asoshi Rahul Gandhi ket nung ita ka lir. "Onoki kong aser kodang mepeshitsu aji meteta lir. Ajisüaka legal team-i tanga maparentem achaayangdar," ta Jairam Ramesh-isa shisem.

sentong ayongzükba agiogo. Industrialists, traders, transporters, MLA, officers mesüra aluyimertem shia metoktsüi meita odar. ED-i Madhya Pradesh, Uttar Pradesh, Uttarakhand, Gujarat aser Karnataka (BJP-i yimsü asüba state) nung meita aoba sentong kecha ayongzükba magi. Item state nung yabo ED indang office mali asütsü südi," ta Baghel-i ashi.

Chhattisgarh Pradesh Congress Committee Treasurer Ramgopal Agrawal aser nagmati shishilembar Sunil Agarwal den sendaka aliba ali kiojentem meita aoba den state yimtiba Raipur aser Visakhapatnam (Andhra Pradesh) nunga tesem kar meitaogo, ta parnoki ashi.

Parnokisa, bureaucrat tejentem aser nungtugu industrialist tem meyong kiojen aser alitem meitaogo, ta ashi.



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 29, 2023

Tokolak nung Tokolak !

Nagaland state kübok department-bo zünger mezüngma, anungji government ita sen chia mapa inyaker tema mapa dang nungibo teimba lir. Aji oda, nungdak aküm nungji department shia Directorate aser Secretariat ajak nung tokolak kaka shimba agi Nagaland state ya tokolak masü tokolak kisüng agi sünga lir. Ibaji kodang bilemdangdir, mapa inyaker meinyakma adokba agi masü saka tokolak agi mataba agi department aika aküm südi ta angateter. Ano, deparment aika agi temulung masü district-a joko tayudak makatsüsa kümogo. Itemji kodang bilemdangdir, atangji, item mapatemji tokolak agi inyakba masü tokolak agi inyakba mapatem lir. Item kolaktem jagi tarulen masü teindoklenang temulung tagütsüba agütsür. Ashi, Nagaland ya tokolak agi masü tokolak agi anishi nungbo yamaibo sensaka melila. Khen bilemsübo tajung saka taaktsüka Nagaland nung tokolak paikatii anir government mapa nung inyaker paikatii achiba ita sen ajak ya Delhi nungi angati arur. Iba sen jagi Naga nunger taküm alirba dang ashí, Nagaland state küm ka atema renemba senotsü sentongji reprangdangra, department ka annual budget-ji Nagaland nung arogo ka budget dang nung ishinba angutsü. Ibaji kodang medemdanga bilemdangdir, Nagaland renloktsüba sentong aser mapatem yabo arogo nemang nungloktsünütsüka reprangtetter. Atangji, asenok dak tajung kaji arogo nembo asenoki tenla agütsür saka majung kaji government dang nungibo temeshiang meshir. Aji oda, kodang asenoki arogo nem ter shilem agütsür külenang ano temoatsü, tenüngsang aser temulung tenla agütsüba ama yimten nema asenoki asen dangi rongsen aruba yari alimelen agütsü tenzükdir, idangjibo Nagaland government kübok department-tema tebilemba nungdak mapa karbo asenoksasa inyaktetsüsa senotsü lemzüksütettsü. Ajisüaka, itemji shitakba mapa kuma inyaka otettsü asoshi Nagaland nung tokolaktemi anir tokolak amshia nübortemi parnok dak temulung lemtettsüsa renematsüla. Iba amajika mesüra tang – tangbo nübortemi pei aaba nungi state government nem arogo nem agütsüba dang nungi tali noklang nung metsü shilema agütsüyonga kongi odaktsür memetetka samatsü ta nübortemi tokolak purtem dak temulung melemer. Aji oda, tanü Nagaland yamai sensakba ya shia arudakja takar kümdaktsütsü atema tamasa sen masü ochishia inyaktsü mulungtetba tokolak aser shisatsü nungdaker. Tanü Nagaland sensakba ya rongsen makaba agi masü saka rongsen shitak yateta amshitsüsa tokolak shisatsü maliba agi okronger. Aji oda, nübortem asoshi tajung inyaktsü bilemba kolok aliba tokolakibo pei department nung küm piyong atema sen core asem pezüka lemzüka yur, iba sen nung jagi sen lakh metsü semer kati gari ka tama malitsü ! Kasaji, pei lima meimba kolok aliba tokolakibo pei department nung küm piyong nung rongdak nungdak nung amshitsü sen core anasemka lemzüka aliba nungi kidang süngojemtsübo memeshitsü. Reprangdangra, Nagaland state kübok department tulutiba nem küm ka asoshi lemzüksüba senji tanga yimti tulutem khen yutsür, asen anasa aliba Guwahati yimti nung apu (flyover) ka jenjanga masü. Nagaland nung kümsülusü nung stadium ka merenemtet aser medical college ka metenzüktet ajokshidang, asenoki nungdak ajak nung oba jaa amshisang Assam Chief minister Himanta Biswa Sarma-i par state nung sen core meyririjang dak tali agi medical college küm shia amato renema lapokba asenoki angur aser Guwahati nungbo manger sangwa nung sen core noklang jenjang apu renemer alir. Ibaji tokolak kijai masü pei lima aser nübör meimba kolok aser shisatsü agi inyakba mapatem lir. Asenoki Himanta Biswa Sarma bo tsüngrem amai bilema tejaoka jaoker aser bushia aoer asünungji, pa dang nungi danga ajizüka asenok tokolak purtemi pei lima aser pei nübör meimba kolok aser shisatsü amshia Nagaland jungjunga tasen kuma yanglushidaktsüner.

OLEMSABANG

NI TARUTSÜ NAGA NUNGER TIANGUA NÜKTZÜ YIMA ZÜLUR

- SM. Meren, Ex.Pastor Ungma

(Yashi adok nungi...)

Asen kidanger anasatiba Burma Army yimsüsüba nung melinüba agi nübör ajunga pei ki pei yimli pei linük toktsür jenshiba mangashir no? Nagaland State mejema yanglur küm 60 tema süir, Stateji nisung ka asünungbo joko tambur kümer alitsüba, aser pai par ki jen aser tagitarutsü ajak bentena yangerteter alitsüba mapang saka Nagaland Statebo repranggang Nagaland Development tsütsü reprangdanggang kechisa lir aser kechi nungsa lir? Nagaland nung adokba chiyungtsü tilaba nungi tuluba tashi, aben-süoshi, tagitarutsü osettsüset Nagaland nungi kechi atoker?

Nagaland State ngur küm 60 tema süir aser tanü tashi nung Nagaland factori kwi lir? Nagaland Made kechisa lir? Kar lira shiangoto? kecha maka süti hau ta shiangma, tongtibangsa kecha nunga lenmang tajung kata maka, Light tajung maka, tzü tajemtsü maka, Hospital tajung kata maka, anungji nübörtem shirangertem talangi moteter anungji ajak sümadagi. Lanurtem asoshi University tajung ka bener maruteter, asen kidanger Assam nungbo University tesüngmangtsü tajung jenti lapokteter lanurtem züngtepdagi, Naga nunger lanur tashitemetet kümnertem Assam University nung züngtepdakaji repranggang, aser India tesem balala nungi aser Assam nungi Nagaland nung azüngtsü arur kwika aliaka? Pi lima dang kanga taktsü masü no? Naga nunger kechi ajir? Küm 60 tain State ya tashi dang inyakteter no ta süngmanger.

Ano repranga liang, Nagaland sanction kwika arur timbaka Kohima aser la area nung endokmar aser Debarmental balala kechisa aka noklang nung 60 aser 70 shilembo Kohima area nung amenoker saka parnok dak alaka tanga Districtlenbo züngteta dang lir, taoba putu mapang ka nung Assam aser Meghalaya Capitalji Shillong liasü aser Centre nungi aruba sen ajak agi Shillong menokbang saka küm ishika jakdang tena State balala aküm aser Assam Capitalji Disbur Guwahati nung amenok, Assam nungertema tangang Capitalji yangpangdagi, ibaji mesüka Naga nungertema ataloktsü menua malitsü. Kechiaser mapang Ka nung Centre-i ENPO nem State agutsütsü aser parnok balaka akümstsü aser memenui Angami tsütsü Tenyidie kintem ka oa adoktsü aser Kohimaji parnok meyong akümstsü aser tarutsü nung tanungba kintemji teka tazüng akümstsü ajiteter aser Naga yimten tebilemstsü ajakji aji tatembang asütsü, kechiaser Centre temulungjang khuretji aji tatembang asütsü. Idangji Naga lima ayatai tiaji ajurutsü ta ajiteter. Idangji Naga nungertemi China dak jenokti ta melungtet nung Keyi nungi jenteter Shirem dak jenok ama akümstsü, kechiaser Communism tetsütiji Chinaji lir aser idangjibo Christan limaji kenüa anü malutsü, ano asenok kidanger Burma dak jenokti ta bilemtet nung Budist yimsü tesashiba dak jenoker asütsü aser par Army yimsüsüba kübok melinüba agi par Burma nübörtema ajak jenshir, anungji jungli mejungli obala India densa liti ta ser arema ali nung Naga lima ya Hindu lima akümstsübaji hapta ka shi dang agitsü südi, kechiaser Christian Stateji India nung Nagalima ya dang lir saka asenoki BJP moroa akümba ya onsara sabu, pei tamangba yimsü Yisu Khrista kibur ta amangba ya Anküp dang tabuba nung dang menaloka lir, aser BJP tamendakdakji Hindu lima akümstsü ta lir, anungji Naga nunger Khristantembo sen ngura ojang aser asenok sen kara Yisuji sen agi alitettsü temela asütsü anungji ABAM-a anentsü aser Arogoa shibangtsü aser shisa mebului tenütsü nung rong temerem tilala teploker Amar Naga Hindustan ta pelatepdi arung ta nibo bilemer, kechiaser tenla ki sünga sentepyongbo ajakji pei temeten senyong yoka chir menteper timba nung koda? Kechiba menja apunger atsükshishitsü? Pei tamangba yimsü nunga jangja majang aser Naga nüchiso atemaka batikaji teimla mali kechiaser State nung lenirtemji tangang masü aiben yazüa aruba pei ajung asabapurtem dang ta ajiteter aser nüchiso bushirtema telok paikati lemsar kazüteper nung koda, aser Centeri Nagalandji koda ser aika akümstsü ta jangraa repranger nung koda, anungji asenok kanga teimlabo maliago, kechiaser tawa paper nung Congress President Mallikarjun-i odi odia shigoto, BJP Sorkari Naga yimten latettsü jangra mali ta ashibaji shidak tajitetba ashiba lir.

Tanga aser tarutsü nunga Dr.Clarki bener aruba yimsü tamendakdakji ABAM-i anir mamangkori mesüi ametra aser Naga yimden asoshi Dr.Clarki bener aruba Kibuba dak tera yanga ametra aser Naga State leniri Dr.Clarki bener aruba Kibuba dak kimong yanglura Naga limaji teti asoshi Kibubai ajungkettsü aji mesüra Kibubai Yirusalem mabayuba ama Kibubai Naga lima asoshi kenü anogo lemtettsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nigeria nung kiralongrari tamanger 27 tepset

Abuja, Metsüremi/March 28 (Agencies): Nigeria linük kübok Kaduna state nung Fulani shiruru metsürtem aser danga kiralongrar temi tan ita anaben amakba nung Khristanpur tamanger 27 tepset, ta osangtem ajanga ashir.

Lendong anaprong ya Zangon Kataf County nung atalok, kong March 14 nü Langson yimdak tamanger 10 tepset aser March 10 nü Ungwan Wakili yimdak nisung 17 tepset, ta yangji alirtemi ashir.

Langson nung alirtemi ashiba agi, iba lendong ya aonung 9:00 ako nung tenzüka aser nisung aika yiru.

"Sorkar dang jembiba ama mapa agi inyaka mapa tamajung inyaker aputsü ajungshir, kechiaser sorkari parnok meteta lir," ta yangji aliba community development association tir SamAchie-i ashir.

"Nigeria sorkar dang arsanga Zangon Kataf Local Government Area nung sepaitem yoka tai maket Khristanpur takum aser ki o jen samatsürtem aputsü akhangar."

Ungwan Wakili nung Muslim nunger kiralongrar temi iba yimtsüing aser anasa aliba Khristanpur dak aonung 9:00 ako nung tenzüka minute 40 shi lendong agütsür ao, ta yangji alirtemi ashir.

"Yimdak ozü ki kiralongrar aser nok-nü bena aliba shiruru metsürtemi amak. Parnoki ki rongdoktsü aser nisung shinga takum metoktsü. Parnoki ozü kinunger ajak tepset," ta Joshua Solomon-i ashir.

Asürtem ya Daniel Soji, Emmanuel Ibrahim, Jummai Gajere, Aaron Thomas, Rahila Sunday Ishaya, Blessing Zakaria, Felicia Zakaria, Gloria Zakaria, Gaji Tonak, Elizabeth Tokan, Peace Tokan, Favour Patrick, Peace Patrick, Chinwe Patrick, Ruth John aser

Emmanuel John lir, ta Solomon-i ashir.

Kasa lendong nung yirua mozü kidang temang anepalua amunger Khristanpur par trok lir aser itemji Precious Timothy, Sunday Ishaya, Jessica Zakaria, Chison Ikechukwu, Patience Matthew aser Jessica Tokan alitsü, ta paisa ashir.

"Ozü yimtsüing amakertem ya Muslim Fulani shiruru metsürtem liasü aser parnok den kiralongrartem aru. Iba mapang Khristanpur 17 asü. Asürtem rongnung ozü kinunger pongu lir. Taoba mapanga item telok yagi nisung tepsetba kisüing masü saka alua raksaja aru," ta yangji alir Barnabas Tonak-i ashir.

Southern Kaduna nungi Europe-i jena aoba Khristanpuri iba azüdokshi ya aija liasü.

"Tawa Ungwan Wakili aser danga yimtsüingtem nung tai maket nisung 17 tepsetba aser ano aika yirutsüba onoki temolung shiranga bilemstür," ta outhern Kaduna People in Diaspora (SOKAPDA), Europe nung tir Casimir Biriyo aser tezülur Janet Nale nati sangdong ka nung ashir.

"Southern Kaduna nung December 18, 2022 nü Malagum, Kamuru-Ikulu aser Abun (Broni Prono) nung aliba tai maket Khristanpur 38 tepseter ita asem nung iba lendong ya ataloker."

Iba lendong asoshi ketdangsur nungi osang kecha mangazük aser ketdangsur temi iba tesem semdangba kangabo mali, ta parnoki ashir.

"Nigeria aser Kaduna state sorkari lendong timtem ajurua alirtem kangabo meyarir mesüra nisung tepsetba aija sangdong kata agüja mali," ta parnoki ashir.

Nigeria aser talisa Kaduna state nung nisung meimchir takum mapayuba indang

southern Kaduna nungi Europe nun goa aliba Khristanpuri ashir.

"Asenok kumzüksü nangzüker temi nungdakba mera agitsü tim, aser onok bendang lima nung alirtem kanga jashir, kechiaser 21st century nung phone tracking, geo orbits satellite, drones aser tejen yimya nung itdangiterba tem junga mamshir," ta Biriyo aser Nale nati ashir.

"Mapang ka kanga süngjema aliba Kaduna state tangbo yamaji masü, aser yimten yimtsüsür rongnung karibo nisung takum metsüingaret agizüksü imlar," ta ashir.

2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List ajanga ashir.

Khristanpur pua bener aoba, tim masüba mapa inyakba, tashiyim amshia kibong akumba, temang aser tekolok nung timtem agütsüba nunga alima nung iba linük nung timba (4,726) ataloka lir aser tamangba yimsü nung ajemdaker ki aser businesses raksatsüba nungi temaba jenjang nung lir. Taoba küm tekülem ki timtiba raksatsüba nunga Nigeria ya tanabuba jenjang nung lir.

Khristanpur alitsü asoshi linük tamajungtiba 50 asadanga 2023 World Watch List nung Nigeria ya taoba küm jenjang 7 buba nung liasü aser taküm jenjang 6 buba nung lir.

"Fulani, Boko Haram, Islamic West Africa Province (ISWAP) nungi telungpurtem aser dangartemi Khristanpur alidak tesemtem amaker, nisung tepseter, samatsür, tashiyim amshia shi nung medemer aser sen agi alangzüksü mechi pua bener aor," ta World Watch List ajanga ashir.

ANOGO ABEN TSÜNGREM DEN

Asüing Kilirtem

- T.Ken 78:1-8

Tarutsü putu asoshi asenok teinyaktsü lir. Ken züluri zülur, " Parnok chirtem dang nungi itemji onoki miima mayutsü, saka Kibuba tenüngsang, aser pa tashi, aser Pai inyakba sayatenyatem tarutsü putu dang ashitsü"(t.4).

Kechiba asenoki tarutsü putu den Tsüngrem o lemsateptsü? " Aser par tsürabur ama, tashi mangaba aser mazüoktetba putu ka"(t.7). Ibaji tarutsü putu asoshi parnok terünemba lir, kechiaser teimlai tarutsü dak repranger. Yisu Khrista shia aruba ajanga khristantem taküm aliba tamang nung tanaben aso. Asenoki metet asen Kibuba tanaben arutsü aser asenok asen kidang kotaki anir atutsü. Tanu lanur putu nung aikati teimla sen nung, sorkar dak mesüra parnok tashi dak teimla yur lir. Anungji asenok tarutsü putu dang parnok teimla Tsüngrem dak ayutsüba ashiba ajanga asenoki Kibuba temoatsü taruba putu den lemsateper.

Tanabuba, taruba putui Tsüngrem mapatem bilemtettsü asenoki aginer. Pai asenok asoshi inyakba amadoktsü koda temela ! Ajisüaka, asenoki taruba putu nem bilemdaktsütsüla. Shirnoki tesüiba amadoker parnoki maneni kasa aibelenji inyaker.

Tatamsa, taruba putui Kibuba ozüingtemji ayutsüsa asenoki Pa mapatem lemsateptsüla. Ken züluri ozüingren taküm indang mejembir. Pai Kibuba dang meima meimba indang jembir. Au putu tasen dang asenoki teinyaktsü ka lir, aser tatishitsü tajung, sayuba ajanga, lemsatepba aser ajungshiba ajanga asenoki asen mapa ataloktsür.

Ne nem Khristan senmang agütsü. Kodang nai taruba putu den Tsüngrem o aser mapa, nai parnok dang senti lesson ka Pai pa nübur taküm inyakba sayur. Tatishitsü tajung ka alitsü merangang, koba tarutsü putui Kibuba asoshi alitsü tasü indaktsür.

ABAM aser Ao Senden na lungjemer Impur nung tetsü oshi terenlok sentong agi



ABAM Literature & Education Ministry aser Ao Senden lungjemer "Tetsü Oshi Terenlok" sentong ka March 27 & 28, 2023 anogotem Impur nung ayongzüka agidang tangokba noksa nung angur. Iba sentong nung Arogo 26 nungi nisung 44 dena liasü.

Dimapur, Metsüremi/March 28 (TYO): ABAM Literature & Education Ministry aser Ao Senden lungjemer "Tetsü Oshi Terenlok" sentong ka March 27 & 28, 2023 anogotem ABAM Literature & Education

Ministry-i ayonga Impur nung kanga takok ngua agiogo. Iba sentong nung Arogo 26 nungi nisung 44 arua dena liasü.

Tanü asenoki tetsü oshi kanga sabua mejembiba ajanga nungja-koja aika bendanger oshi

agi dang amshia arudar. Ano asen sobaliba tajunga aika mebenshir aser samaa aotsü kanga ana nung lir. Iba ama tia nungsa asenoki libalirora, ashiko tarutsü putu nungbo asen oshi aser sobaliba ya bendanger oshi

asobaliba agi melener kin kidong ang sünga mebendangi libalirotsü shibai metet, ta Rev. Dr. Mar Pongener, Executive Secretary, ABAM ajanga sangdong ka nung ashir.

Anungji asen liba liru

rangben tetsü oshi dak tuluka sendaka alinung tetsü oshi renlokaktsütsüji kanga rongdak nungdak ta iba sentong ayonga agiogo.

Sentong nung "Tanü Tetsü Oshi Jenjang" aser "Tetsü Oshi Zulumen Angazükshiba" onüktem nung tongti tesayurtem Dr. Lanurenla, Asst. Prof. FAC, Mokokchung aser I. Temjen Tzüdir, Secretary, ASLB ajanga jembia liasü.

Rev. Dr. Mar Pongener, Executive Secretary, ABAM aser Chubawati Longchar, Tir, Ao Senden ajanga iba sentong ya tetenzükür sür shisaliok ajak nung shisashirtem ajaki pei tetsü oshi kanga tongtipangsa amshira asen oshi renloka aotsü, ta ayongzüka liasü.

Asen Aortemi asen ayak kümzüka ayutsü nükla tulu yua asen oshi meraketa amshitsü ayongzüker, ta sangdong ajangasa ashir.

AO OSHI ANGAZÜKDAK: TANÜ ANGAZÜKTSÜBA OJANG



Pi

(n) tangar (other)

*Asenok ajaki pei dang nungibo pi dang tali meimtsüla.

Piga

(n) khien lir, tetsüngda tatsüka (short time and distance)

*Asenok ajak khien **piga** lir apusotsü.

OLONG PAITEP # 6470

Grid for OLONG PAITEP # 6470 with numbers 1-17 and shaded cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6469 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Iipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

KHEN SHISADANGDI

TEKOLAK-BA TEPELA AGI MENUBA MANENTETER

Tekolakba : Hahahah... Hahaha hahahah Haaha haaha hhahaha....

Osang Zülur : Arrreeee...Sir !!!??? Ya kechi asü...??? Na yamai pelar... ???

Tekolakba : Waaooo... Kodaser mepelatsü.... "Opposition-less Government" Hip.... Hip.... Hooorrrraayyy.... Hip.... Hip.... Hooorrrraayyy....

Osang Zülur : Ayyyyeeyeee... Sir... Na kopi meli-i tekolak nung nemettsü ako-di... Rulling party MLA-35 den... ano tangar Party-pur dena mesütsüji terabo asaktsü ako... Opposition seat nung memennüba odangbo masü... Kopi meli-i langkabosa akhangtsü ako.... Ajiser, tebilemba metongtsüra... Minister menden agi matar o Portfolio agi mulung masürtem den lokteper Sorkar tanga ka kümra koda...!!!!!!?????

~ Lilir : L. Kika Pongener.

Manipur nung Naga lennir aser taoba minister RV Mingthing asü



Imphal, March 28, 2023 (Agencies): Taoba Manipur minister aser Tangkhul Naga yimten lennir RV Mingthing

Mongulbarnü alima nungi pilaa ogo. Pa arishi küm 92 liasü. Ukhrul district kübok Kuirei yimtsüing nung par kidang pa asü. Tangkhul Naga Long (TNL) nung taoba president RV Mingthing ya April 20, 1931 nü aso aser pai 2004-2007 tashi regional Manipur State Congress (MSCP) president inyaka liasü. Manipur kübok Ukhrul district nung Chingai Assembly constituency nungi pa MLA

inyak aser 1989 nungi 1990 tashi Tribal Affairs and Sports minister inyak. 1985-1989 tashi pai Manipur Legislative Assembly nung Hill Area Committee chairman inyak. RV Mingthing-isa 1975 nungi 1978 tashi Ukhrul district, Manipur indang Autonomous District Council chairman inyak. Pa ya United Naga Council aser Manipur nung Naga nunger Lui-Ngai-Ni Festival indang founder member liasü.

PM Modi-i April 14 nü Kokrajhar Medical College lapoktsütsü

Kokrajhar, March 28, 2023 (Agencies): April 14, 2023 nü PM Modi-i Kokrajhar Medical College and Hospital and Nursing College lapoktsütsü ta Bodoland Territorial Council (BTC), Chief Executive Member (CEM) Pramod Boro-ashi. "Tanü Minister Keshab Mahanta aser Minister UG Brahma na den Kokrajhar Medical College & Hospital &

Nursing College semdangogo. April 14, 2023 nü PM Modi-i lapoktsütsü aliba atema semdang" ta Boro-i ashi. "Maparen junga inyakdar aser iba college lapokba sülen BTR region nung healthcare facilities peria dang angutsü. Tanü MLA Lawrence Islary, Health & Family Welfare EM Arup Kr. Dey Principal Secy, Govt. of BTR naprong liasü" ta paisa metetdaksü.

CEM Boro-isa 7th Annual Conference of Chirang District Committee, UPPL indang Open Session nung aden. Iba sentong nung Cabinet Minister UG Brahma, Dy CEM Gobinda Chandra Basumatary, MLA Lawrence Islary, EM Ranjit Basumatary, MCLA & UPPL GS (A) Madhav Chetry, MCLA Amar Basumatary, Pratibha Brahma aser tanga party lennirtem aden.

Power peria manguba ajanga load shedding asür: CM Conrad

Shillong, March 28, 2023 (Agencies): Meghalaya nung power peria manguba ajanga load shedding aiben süa arur ta Meghalaya chief minister Conrad Sangma-i ashi. Meghalaya sorkari public nem timtem agütsüba ajemtsü atema meranger aser taküm

power maparen tajungba kümogo, ta pai osangbener den jembidang ashi. "Taküm February aser March ita power cuts maliasü" ta CM Conrad-i ashi. "Tesüiba kümtem den medemdangra küm ana tsüngda power sector jenjang tajungba

kümogo. Iba tebilemtsü ya mapang talangka ajurua arur" ta paisa shisem. "Onoki power regulations kar latettsü aser load shedding ajanga public nem timtem agütsüba ajemtsü. Anüngdang tesem kar nung mekongshitsü atema inyaksü" ta Conrad-isa ashi.

Assam sorkari Sainik School talila lapoktsü lemtetogo

Guwahati, March 28, 2023 (Agencies): Assam sorkari state nung Sainik School talila lapoktsü telemteba agiogo ta Assam chief minister Himanta Biswa Sarma-i metetdaksü. "Asen armed forces nung sempet tajungtem anioktsü atema Sainik School talila lapoktsü sorkari lemtet" ta pai ashi. Assam chief minister Sarma-i state education minister

Ranoj Pegu aser tanga ketdangsürtem den iba onük atema senden amen. Iba senden nung Assam CM Sarma-i state education department ketdangsürtem den Adarsh Vidyalyas inyaka aotsü, BEd colleges aser teaching posts talila akümtsü aser kin 6 atema professional colleges nung special quota lemsütsütsü indang jembi. Silchar, Kokrajhar, Golaghat,

Karbi Anglong aser Dhemaji nung land allotment process tembangogo ta yaküm Assam education minister Ranoj Pegu-i shia liasü. "Linük nung Sainik School 33 lapoka lir. Centre-i mulungba sülen PPP mode nung Sainik Schools 5 talila lapoktsü atema Assam sorkari lemtetogo. Onok yakta Union Defence Ministry den iba atema jembitsü" ta Minister Pegu-i ashi.



Waris Punjab De (WPD) tanishisang aser ashishitep aketba sayutsüngir Amritpal Singh den yariteper ka Dibrugarh Central Jail-i anir arudang agiba noksa ka angur. Tanü anir aruba nisung ya Amritpal indang bodyguard Varinder Singh lir aser pa ya anogo ishika tejaklen Punjab nung apu. Mongulbarnü pa tayimtsü ajanga Dibrugarh-i anir aru ta Superintendent of Police Shwetank Mishra-i metetdaksü. March 19, 2023 nü mezüng Waris Punjab De (WPD) zünsügem 4 anir aruba sülen Dibrugarh Central Jail nung multi-tier security renemogo aser tang tashi nung iba tepuokdak WPD züngsem 7 puoka lir. (Dibrugarh, March 28)

[See Regulation-15 (1)(a)] / 16(3)

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)

Case No.: OA/437/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 3014

CANARA BANK
VS
MS VIKHELI K AWOMI

To,
(1) MS VIKHELI K AWOMI
D/W/S/O- C O Khekutu Awomi
C O Khekutu Awomi House No 4 Room No 52 Supply, Colony Dimapur 797112
Dimapur, NAGALAND -797112



Also At.

C O NIKHEZHE SEMA THILIXU VILLAGE DAYAPUR ROAD BLOCK NO IV DIMAPUR 797112
DIMAPUR, NAGALAND -797112

SUMMONS

WHEREAS, OA/437/2022 was listed before Hon'ble Presiding Officer/Registrar on 15/03/2023.

WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. 2094176.77/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

- (i) to show cause within thirty days of the service of summons as to why relief prayed for should not be granted;
- (ii) to disclose particulars of properties or assets other than properties and assets specified by the applicant under serial number 3A of the original application;
- (iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
- (iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;
- (v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 21/04/2023 at 10:30A.M. failing which the application shall be heard and decided in your absence.

Given under my hand and the seal of this Tribunal on this date:18/03/2023.

Signature of the Officer Authorised to issue summons.
Assistant Registrar
Debts Recovery Tribunal
Guwahati

Note :Strike out whichever is not applicable.

MENUNGRA BILEMTETER



ASÜR ETILEMLA (CHUCHU TOWN)
29.03.2022 ~ 29.03.2023

Pungmang ka ama bilemer, saka asangsang nung nai onok toksür or küm ka abensa aruaka, na onok den teti ali ama bilemer. Nü temeim mapatem, sayu o aser nü sarasadem onok molungjang nung teti lir. Tanü onoki na bilemteta sarasadema amonger.

~ Temeim Kinungbo, Jala, Jabaso aser Kinungertem.

Pelaba Lemsateper



ASO :
21-08-1942

ASÜ :
17-03-2023

Onoki teti meima aliba ojala asür **Imonenla**, ajungbena iba lima nungi pila aoba anogo nung kija kibong, Arogo aser lokti balala ana aser talang nungi shirnokisa rongsen, nübu, shisatsü aser sarasadem agi yaritepogo, nenok ajak dang kangasa pelaba lemsateper. Nenok mapa tajung asoshi asen Teyanglur Tsüngremi maneni mojangma ta ozü sarasadem.

Temeim Chirnur, semchirtem, anukapang aser kinungertem

Germany-i Ukraine dangi Leopard tank tem yokogo

Berlin, Metsüremi/March 28 (Agencies): Germany nung Leopard 2 tanks mezüngbuba Ukraine dangi yokogo, ta German defence ministry-i ashi.

Ukraine nunger crew tem nem tank amshitsü atema tangazükba agütsüba sülen cutting-edge main battle tank 18 agütsüogo.

Defence Minister Boris Pistorius-i ashiba agi, tank tem yagi tongpang nung teyari tulu agütsütsü, ta temulung lema bilemer.

Kasa mapang nung UK nungi Challenger 2 tank tema Ukraine tongogo, ta Ukraine nungi sangdong ka ajanga metetdaksü.

Russia nunger den raratsü atema Ukraine-i ita aika parnok nem modern vehicle tem agütsütsü asoshi mepeshia aruogo.

Leopard 2 tank tem tonga aruba indang osang Ukraine sorkari tang tashi metetdakja mali, ajisüaka UK nung yangluba Challenger 2 tank tem linük tonga aruba metetdaksüogo.

Europe kübok linük balala nung Nato linüktemi yangluba Leopard 2 tank 2000 shi amshidar. Iba tank ya rara nung amshiba tank tem rongnung tajungtiba ka ta züingshir.

Germany-i mezüngbo Leopard 2 tank agütsütsü nongnanga liasü aser iba den tanga linüktem nema parnok ket nung aliba iba tank tem magütsütsü atema tenokdangba agütsü, ajisüaka January ita agütsütsü mulunga agizüka liasü.

Germany temzüng ozüng kübok, Leopard 2 tank tem ya tanaben tanga linüki yoktsü atema Berlin-i temelaba agütsütsüla ta shia lir.

German Defence Minister Boris Pistorius-i ashiba agi, nangzükba ama tank tem Ukraine nem mapang shitak nung agütsüogo.

Germany army-i taoba hopta ishika tsüngda Leopard 2 advanced A6 variant amshitsü atema Ukraine nunger tank crew nem tangazükba agütsüogo.

Iba tank ya Russia indang T-90 main battle tank den

tokteptsü atema mejeta design süa yangluba lir aser iba tank ya anüolen linüktem ket nung aliba tank tem dang nungi anepalutsü temelaba aser iba yagi totzua tajemba achir.

Leopard 2 tank tem dak alia germany-i Ukraine nem specialist tank-recovery vehicle ana aser Marder infantry fighting vehicles 40 agütsüogo.

Kasa mapang nung UK nungi yokba Challenger 2 tanks Ukraine tongogo, ta defence ministry otongdar Iryna Zolotar-i AFP news agency dang ashi.

Challenger 2 den bendanglen nungi yokba military vehicles tem den tangokba noksa ka pa indang Facebook page nung lemsatepba mapang Defence Minister Oleksii Reznikov-i, UK indang tank ya "work of military art" ka ta ashi.

Iba dak sendakba nung UK Ministry of Defence-i telangzüba kecha magütsü, ajisüaka taoba mapang Briain nung training agia aliba Ukraine nunger tank crew tem tank tem amshitsü atema training tembanga agiba sülen kidangi meyipango, ta metetdaksü.

North Korea-i ano ballistic missile ana tendangogo

Seoul, Metsüremi/March 28 (Agencies): North Korea Hombarnü linük anütoklen tzüküm nungi short-range ballistic missile ana khaketa yokogo. United States-i South Korea tzüym-i military exercise balala atema carrier strike group ka yoktsü renemer aliba mapang iba missile tendangogo.

South Korea indang Joint Chiefs of Staff-i ashiba agi, missile ya linük anüolen nungi khaketa yokba sülen linük adena yima ao. Japan indang Japan indang exclusive economic zone tema nung tsük ta shiogo.

Hombarnü missile ana tendangba densema North-i iba ita missile tenetbuba tendangogo aser iba ajanga Korea linük ana temeket nung tensa mejungi kumogo. North Korea-i tawa hadirtem aika kanga atonga tendanga arudar aser kasa mapang nung US aser South Korea natia iba inyakyim atema telangzüba agüja military exercise balala kanga atonga ayongzüka agia arudar.

US aser South nati taoba hopta-ang anogo 11 exercise sentong ka ayongzüka agiogo, kong kümtem tsüngda field training tulutiba densema liasü.

Ajisüaka North Korea-i hadir balala tali tendangtsü inlar kechiyong joint drill ka atema United States-i aircraft carrier group ka iba hopta iba peninsula yagi yoktsü renemer lir.

North Korea-i taküm ballistic aser cruise missile 20 dak tema tendangogo. United States nem parnok indang nuclear jenjang agizükdaksütsü aser tenokdangba agütsür aliba agindaksütsü atema merangba mapang iba jenjang agiogo.

North Korea-i iba ita tendangba rongnung intercontinental ballistic missile ka aser short-range missile balala densema lir, koba South Korea indang missile defense mesüngjemteti kümdaksütsü atema sayaba ka lir. Parnoki South Korea aser U.S. mainland naprongla nung nuclear khaloktsütetsü ta sayua arudar.

North-isa nuclear-capable underwater drone ka tendangogo aser ashiba agi iba yagi "radioactive tsunami" tulu ka tenzükdaksütsü tashi lir aser iba ajanga navy indang rongtem raksatsütetsü. Ken o asadangertemi North Korea-i ashiba dak tamang makar saka kechi hadir südir süang iba ajanga ano tebilemtsü talila ka bendenloktsüogo.

Abu Metha-i Sportstar National Sports Conclave nung shilem agi



Dimapur, Metsüremi/ March 28 (TYO): Advisor to Chief Minister, Nagaland aser Associate Vice President of the Athletics Federation of India, Abu Metha, March 27 nü New Delhi nung Ibuba Sportstar National Sports Conclave nung o jembitsü atema jaoka liasü. Iba conclave ya India nung sports periodical magazine The Sportstar aser The Hindu na longjemer ayongzüka liasü.

Sentong nung Union Minister for Information & Broadcasting and Youth Affairs & Sports, Anurag Thakur-i okilao jembia liasü.

Conclave nung shilem agirtem rongnung taoba mapang Olympian tem, corporate representatives, Government of India sports administrators officials tem densema liasü. Iba den ano World champions Nikhat Zareen, Marabai Chanu, Sarita Devi, cricketer Harbhajan Singh, national federation of Athletics aser

Football tir Adille Sumariwala aser Kalyan Chaubey na, asayar Rani Rampal aser senior journalists aser sports writers temia shilem agia liasü.

O jembiba mapang Abu Metha-i, saisapong dak sendakba nung northeastern state tem ya lenla balaka nungi reprangtsü ayongzü. Paisa, India sorkari infrastructure, Human Resource aser asayartem development programme tem dak sendakba nung iba tesem nung sen timba intoktsü nungdaker ta ashi. "Northeast nung sempet tajung aketba asayar aika lir aser iba tesem nung aliba nisungtem ya yimya agi asayartem lir," ta pai ashi. Koleni odir oaka nüburttem asaya balala asayaba angutsü ajisüaka tia maka infrastructure tajung, quality Human Resource aser saisapong renloka aotsü atema lenmang sadema lapoka maliba ajanga lanurtem nem tetsükdaktsü agütsür, ta pai ashi.

Metha-isa, telungpur tebilemstü aser azütokshi lendong balala aliba ajanga lanurtem aiben tetsükdaktsü adoker, ajisüaka saisapong ajanga linük yangerba nung shilem agitsü atema lanurtem nem sabang ka agütsür, ta ashi. Paisa, sorkar dang sports infrastructure atema senotsü intokba yimya koba 90:10 liasü iba ya bilemdangshitsü ayongzü.

Maneni pai corporate aser industries sector tem dang north east nung saisapong nung senotsü intoktsü ayongzüka liasü.

Pai national federations tem dang northeast nung tang dang nungi talila mapang benoka inyaktü ayongzü.

Nagaland Olympic Association sangdong ka ajanga ashiba agi, Metha-i, infrastructure aser teyari dang shidak agütsüra north east nungi asayartemi takok tajungba ngutetsü aser iba tesem nungi lanurtemi India tali wangshidaktsütsü, ta ashi.

Nagaland team Senior National Sepaktakraw Championship nung shilem agitsü



Dimapur, Metsüremi/March 28 (TYO): Nagaland Sepaktakraw Senior tetsür aser tebur team 33buba Senior National Sepaktakraw Championship nung shilem agitsü. Iba asayamung ya Nagpur, Maharashtra nung

April 1 nungi 5 nü tashi asayatsü.

Team nung tetsür 14, tebur 4 aser ketdangsur pezü densema lir aser parnok Bodhbar anepdang Nagpur-i aotsü, ta Nagaland Sepaktakraw Association

secretary Holshe Khrieo-i ashi.

Iba asayamung ya kanga tongtibang lir, kechiyong iba ya taruba 37buba National Games Goa 2023 atema qualifying round aser 19buba Asian Games China 2023 atema selection asaya asütsü.

ISL: Manolo Marquez-i Hyderabad FC toktsütsü

Metsüremi/March 28, 2023 (Agencies): Indian Super League franchise Hyderabad FC indang head coach Manolo Marquez-i 2022-23 season tembangba sülen pa mapa toktsütsü.

Spain nunger coach shiba lenisüba nung Hyderabad pur 2021-22 season nung ISL kokogo aser taküma semifinal tonga aniogo, pai club toktsütsü atema telemtetba agiba ya jelia metetdaktüsügo.

Ajisüaka Marquez lenisüba nung Hyderabad team iba season tembanga asayatsü, kong taruba Super Cup aser continental spot atema playoff densema lir.

Hyderabad FC kibur Varun Tripuraneni-i ashiba agi, "Manolo lenisüba nung club season asem kanga junga asayaago. HFC kübok ajak tenung nung, club pur league nung tajungtibatem rongnung toktsüba atema Manolo dang kanga pelaba lemsateper."

"Temelener ka bushitsü atema mapang peria agütsütsü asoshi Manolo-i club toktsütsü atema telemtetba agiba


February ita tetenzüklen metetdaktüsügo. Iba ajanga pai club akümtsübuba sayur," ta pai ashi.

Club toktsütsü telemtetba agiba indang jembiba mapang Marquez-i, "Hyderabad nung season asem kanga jangradema inyakogo aser iba atema ni club nung sendaka alir ajak dang kanga pelar. Ajisüaka season ano metembang lir. Onok ano kanga tongtibang asayamung Super Cup nung asayatsü lir, kong onoki toktepa takok nguner," ta ashi.

2020 küm August ita Hyderabad-i aruba sülen Spain nunger coach yagi lanur team ka arangtetsüsügo, shirnok taoba season asem tsüngda kanga renlokaago. 2020-21 (29 pts) season nung parnok pongububa nung tembanga aser iba sülen 2021-22 (38 pts) season champion aser 2022-23 (42 pts) season nunga tanabuba jenjang nung tembanga liasü.

Hyderabad FC-isa, parnoki coach tasen bushi tenzükogo aser mapa tapet ka nung osang agütsütsü ta metetdaktüsü.

WYC: Bharali Bedabrate-i bronze medal angu



New Delhi, Metsüremi/ March 28 (Agencies): Durres, Albania nung asaya aliba IWF World Youth Championships tebur 67kg category asaya nung India nunger weightlifter Bharali Bedabrate-i bronze medal nguogo.

Hombar aonung arishi küm 15 tain asayar yagi ajak senteper 267kg (119kg+148kg) ajungketa tasembuba jenjang nung tembanga liasü.

Armenia nunger asayar Seryozha Barseghyan 275kg (128kg+147kg) aser Saudi Arabia nunger asayar Mohammed Al Marzouq 270kg (119kg+148kg) nati gold aser silver medal ngua liasü.

Bharali-isa, clean and jerk section nung 148kg ajungketa bronze medal ngua liasü.

Continental aser World Championships nungbo medal

ya snatch aser clean & jerk atema medal balala agütsür ajisüaka Olympic Games nungbo section anaprongla senteper seret timtiba ajungketer nem dang medal agütsür.

Commonwealth Games champion Jeremy Lalrinnunga-i snatch nung 140kg aser clean jerk nung 166kg ajungketa ajak senteper 306kg ajungketa lir, koba youth men's world record lir.

Tetsür 49kg event nung Koyel Bar-i ajak senteper 144kg (64kg+80kg) ajungketa tekububa nung tembanga liasü.

Mina Santa shibai 153kg (70kg+83kg) ajungket liasü, la tetsür 55kg event nung 13buba nung tembanga liasü.

Arishi küm 13 nungi 17 tsüngda aliba lifter tem youth championships nung asayateter.

BILEMDANGANG

"Rongsen dang nungi shisatsü dak temulung alem tajungba."